

Protocol fat bun da la radunanza cumünala dals 16 november 2011**Protocol no. 14****Radunanza cumünala dals 24 october 2011, 20.15 – 22.45**

Preschaintas: 44 persunas

S-chüsats: Otto Roner

Tractandas:

1. Protocol da la radunanza cumünala dals 1. settember 2011
2. Contrat da concession Panas-ch Sura cun l'Uina SA
3. Ledscha davart l'organisaziun in cas da catastrofas – Orientaziun per suottametter a la cumünanza d'urna
4. Cumprita dal stabilimaint da la posta – Orientaziun per suottametter a la cumünanza d'urna
5. Varia

Il capo constata cha la radunanza saja gnüda convochada in basa a nossa constituziun cumünala e dumonda sch'inchün haja da far objecziuns. Sainza chi vegnan fattas objecziuns, vegnan nominats seguaints scrutinadurs: Armon Nuotclà e Duri Fried.

Il capo salüda ils signurs Thomas Simeon ed Eugen Caduff sco rapreschantants da la Posta ed a sar Daniel Koller sco rapreschantant da la TESSVM chi sun gnüts invidats sco referents per la tractanda 4 - Cumprita dal stabilimaint da la Posta. Sün dumonda dal capo es la radunanza perincletta da trattar il prüm la tractanda 4 per resguardar ils referents.

1 942 POSSESS DA FINANZAS D'EDIFIZIS
Cumprita dal stabilimaint da la Posta

In sia introducziun spiega il capo co cha la situaziun a regard l'uffizi ed il stabilimaint da la Posta as preschainta actualmaing:

Avant raduond ün on ha la Posta decis da vulair müdar l'uffizi da Posta da Sent in ün'agenzia da Posta chi gniss integrada in ün affar da partenari cun l'incumbenza da manar l'agenzia. In seguit nu gniss il stabilimaint a Sot Pradè plü dovrà da la Posta e la Post-Immobilien es perquai intenziunada da vender il stabilimaint. Culla vendita dal stabilimaint immez il cumün per adöver privat perdess Sent ün lö predestinà per üna gestiun publica chi ha eir üna valur sco lö d'inscunter. Il cumün da Sent nu vuless esser destinà sco fingià blets oters cumüns ad avair ün center cumünal mort oura. Perquai as chatta il Cussagl cumünal in dovair da trar rimedis per mantgnair la vita in cumün e per spordscher tant als indigens sco eir als giasts ün centrum da cumün activ e vivaint.

Ils duos rapreschantants da la Posta sar Thomas Simeon e sar Eugen Caduff preschaintan la situaziun da la Posta chi's ha müdada i'ls ultims ons eir a Sent causa cha'ls cliaints han sviluppà ün nouv cuntegn da consüm in dovrand vi daplü las novas tecnologias da comunicaziun e las novas sportas per evader ils pajamaints. Tenor sar Simeon as han las frequenzas a Sent diminuidas da möd cha la Posta nu vezza plü la pussibilità da manar üna gestiun cun uraris da fanestrigl chi cuntaintan. Perquai vuless la Posta vender lur stabilimaint e surdar ad ün affar da partenari la gestiun d'ün agenzia da Posta. Sar Eugen Caduff sco respunsabel per las agenzias illa Svizra orientala preschainta lura als votants co cha ün'agenzia da Posta funcziuna e che sporta ch'ella ha.

Sco terz preschainta sar Daniel Koller la perspectiva da la TESSVM chi füss tenor la Posta l'affar da partenari ideal per surtour la gestiun d'ün agenzia da Posta. La collavuraziun tanter la Posta e la TESSVM funcziuna fingià in oters cumüns cun success. Tenor sar Koller profitess eir il büro d'infuormaziun turistic da Sent fich bler vi da quista collavuraziun causa cha'ls uraris da fanestrigl pudessan gnir schlargiats pel dubel da fin uossa. Implü füss il lö a Sot Pradè bainquant plü central co quel dal büro a Schigliana quai chi füss ün fich grond avantag. La TESSVM füss perquai fich interessada da tour a fit il büro i'l stabilimaint da la Posta per realisar la sporta cumünaivla dal büro d'infuormaziun turistic e da l'agenzia da Posta.

In seguit declera il capo amo il möd da finanziaziun da l'aquist. Pel mumaint survegnan ils cumüns credits per fich favuraivlas cundiziuns, uschè chi füss previs da tour sü ün credit. Tenor il capo gnissan ils fits pel credit cuvernats da las entradas calculadas da raduond frs. 23'000- dals fits da las abitaziuns e dal büro da turissem. L'entrada our da la vendita dal büro da traffic existent a Schigliana nu vain per intant amo resguardada causa chi nun es amo scleri che chi capita cul büro existent. Il capo intunescha cha l'aquist dal stabilimaint da la Posta füss ün'investiziun extraordinaria chi nu blockess las ulteriuras investiziuns cha'l cumün ha da preverer pels prossems ons. Causa chi's ha vulgü gulivar i'ls ultims desch ons las finanzas cumünalas, esa gnü investi a Sent in möd fich moderà, uschè ch'in avegnir saraja da far quint cun investiziuns considerablas, ma eir sten necessarias. La discussiun in seguit es fich animada ed ils referents sco eir il capo vegnan cunfruntats cun bainquantas dumondas ma eir cun tschertas criticas a regard il proceder e la trasparenza da la fatschenda.

Our dal ravuogl da la radunaza vain fatta la proposta da metter inavo la chosa e da's tour il temp per sclerir tuot las dumondas amo avertas, sco p.ex. la dumonda da l'avegnir dal büro turistic existent, e da preschantar plü tard ün proget elavurà plü cumplessiv e plü fondà.

In vista cha la Posta nun es pronta da tardivar la vendita dal stabilimaint es il Cussagl cumünal percenter da l'avis cha'l cumün da Sent nu possa mancantar la schanza da s'aquistar quist lö central e fa la proposta da dumandar a la cumünanza d'urna per la cumprita e per alchüns adattamaints da fabrica interns ün credit da frs. 1'100'000.—

Las duos propostas vegnan missas in votumaziun. La radunanza decida cun 20 cunter 12 vuschs da proseguir la proposta dal Cussagl cumünal e da metter la dumonda pel credit da frs. 1'100'000 davant la cumünanza d'urna.

2 935.410.01 Rechav chava Panas-ch Sura
Contrat da concessiun Panas-ch Sura

Davò cha la cumünanza d'urna dals 25 settember 2011 ha approvà la ledscha d'explotaziun e la revisiun parziala dal plan da zonas chi cumpiglia eir l'ingrondimaint da la zona d'explotaziun a Panas-ch Sura vain amo suottamis il contrat da concessiun stipulà cun l'Uina SA a la radunanza. La radunanza fa bun cun gronda majorità il contrat da concessiun cun l'Uina SA.

3 1 SGÜREZZA PUBBLICA
Ledscha davart l'organisaziun in cas da catastrofes

Causa l'urari avanzà e per pudair dar l'attenziun toccanta eir a quist affar, vain la tractanda spostada sün ün oter termin da radunanza.

4 Varia

Our dal ravuogl da la radunanza vain proponü d'involvar prossmamaing eir il Cussagl cumünal nouv i'l proget da la cumprita da la Posta per cha'ls duos Cussagls possan chattar da cumpagnia il meglder proceder illa chosa avant co tilla metter in votumaziun a l'urna. Il votant es da l'avis chi füss puchà sch'ün idea fundamentalmaing fich buna fess navruotta pervi cha'l proget nun es amo madürà avuonda.

Cun quai chi nun vain fat otramaing adöver da la tractanda Varia serra il capo la radunanza.

L'actura: